

मार्निंग डोगरी न्यूज़ बुलेटिन, समें. 09-20 Hrs

<><><><><><>

एह आकाशवाणी जम्मू ऐ, बड्डलै खबरें च तुंदा सुआगत, पैहले खास—खास खबरें कन्नै में अभिलाषा शर्मा।

Headlines

1. प्रधानमंत्री नरेन्द्र मोदी होर मॉरीशस पुज्जे, उत्थें ओह अपने जोड़ीदार नवीन चन्द्र राम गुलाम हुंदे कन्नै दपक्खी वार्ता करगन।
2. मुख्यमंत्री उमर अब्दुल्ला होरें गलाया जे नियंत्रण रेखा ते अंतर्राष्ट्रीय बन्ने उपपर संघर्ष विराम लागू होने करी सैलसफा च बाद्धा होआ ऐ।
3. सरकार 43 जहार शा मते स्कूलें गी नेडमें स्कूलें कन्नै जोड़ेआ। केन्द्र शासत प्रदेश च 3 जहार 336 मास्टरें, 4 जहार 175 लैक्चरें ते 702 हैडमास्टरें दियां असामियां खाली पेई दियां न।
4. सरकारै गलाया ऐ जे जनवरी 2025 तगर 3 लक्ख 70 जहार शा मते रोजगार नोजवानें लेई जम्मू कश्मीर रोजगार पोर्टल उपपर पंजीकरण कीता।
5. गुलमर्ग च खेलो इंडिया स्यालु गेम्स च एथलीटें दा शानदार प्रदर्शन चला'रदा ऐ। आईटीबीपी सेना ते हिमाचल नै बक्ख—बक्ख खेड्डें च शानदार प्रदर्शन कीता।

<><><><><><>

PM-Maurithus

प्रधानमंत्री नरेन्द्र मोदी होर अज्ज बड्डलै मॉरीशस दी दऊं दिनें दी यात्रा पर पोर्ट लुइस पुज्जे। ब्हाई अड्डे पुज्जने पर मॉरीशस दे प्रधानमंत्री नवीन राम गुलाम होरें आपूं उत्थें आइयै उंदी अगुआई कीती ते मॉरीशस च उंदा सुआगत कीता। इस मौके उनें गी गार्ड हॉफ हॉनर बी पेश कीता गेआ। दऊं दिनें दे इस दौरे दरान प्रधानमंत्री मॉरीशस दे 57 राश्ट्रीय दिवस समारोह च शिरकत करगन, उत्थूं दे प्रधानमंत्री हुंदे कन्नै दपक्खी गल्लबात करने दा बी कार्यक्रम ऐ। एहदे इलावा मोदी होर मॉरीशस च रौहने आले भारतीय समुदाय दे लोकें आस्सेआ लोआए जा'रदे इक विशेष कार्यक्रम च बी शिरकत करगन। मॉरीशस रवाना होने कोला पैहले जारी अपने इक ब्यान च मोदी होरें आखेआ जे मॉरीशस भारत दा इक करीबी समुंद्री गोआंढी होने दे कन्नो कन्नी इक प्रमुख भ्या लते अफ्रीकी महाद्वीप तोड़ी जाने दा दाखली द्वार बी ऐ। उनें आखेआ जे दवै मुख्य इतिहास, भुगोल ते संस्कृतिक राएं इक दुए कन्नै सांझ रखदे होई जुड़े दे न। उनें आखेआ जे लोक तंत्र दे मुल्यें कद्रें च सांझा विश्वास ते बन सबन्नता दौनें मुल्यें दी सांझी ताकत ऐ। मोदी होरें आखेआ जे ओह मॉरीशस दे नेताएं कन्नै सांझ भ्याली बधाने ते लोकें दी तरक्की ते समृद्धि दे कन्नो कन्नी हिंद महासागर क्षेत्र च सुरक्षा ते विकास लेई स्थाई दोस्ती गी मजबूत करने दे मौके दी हीखी लेइयै उत्थें जा करदे न।

<><><><><><>

मुख्यमंत्री उमर अब्दुल्ला होरें गलाया ऐ जे नियंत्रण रेखा ते अंतराष्ट्रीय बन्ने उपपर संघर्ष विराम दे लागू होने कारण बन्ने कन्नै लगदे इलाके च सैलसफा गतिविधिएं च इजाफा होआ ऐ। आकाशवाणी दे जम्मू संवाददाता हुंदी रिपोर्ट मूजब मिबर सज्जाद शफी हुंदे आस्सेआ जमीनी सुआला दे परते च मुख्यमंत्री जिंदे कोल सैलसफा विभाग दी जिम्मेदारी बी ऐ, सदन च जानकारी दित्ती जे नियंत्रण ते अंतराष्ट्रीय बन्ने उपपर संघर्ष विराम दे लागू होने करी इनें इलाके च सैलसफा दा बाद्धा दिक्खने गी लब्धा ऐ। मुख्यमंत्री होरें गलाया ऐ जे सैलानी हुन उड़ी, अमन सेतु ते दुइएँ थाहरें उपपर सैलसफा लेई जा'रदे न। सरकार इनें थाहरें उपपर सैलसफा गी होर मता विकसित करने गी प्राथमिकता देआ'रदी ऐ।

<><><><><><>

Schools

सरकार नै गलाया ऐ जे 43 जहार शा मते स्कूलें गी युक्तिसंगत बनाने सरबन्धी स्कीम तैहत् नेड़मे स्कूलें कन्नै जोड़ेआ गेआ ऐ। आकाशवाणी दे जम्मू संवाददाता दी रिपोर्ट मूजब एमएलए राजीव जसरोटिया हुंदे सुआला दे परते च शिक्षा मंत्री सकीना इत्तू होरें गलाया जे इनें 4 जहार 349 स्कूलें शा 1 जहार 274 स्कूल जम्मू खित्ते ते 3 जहार 84 स्कूल कश्मीर खित्ते थमां न। सरकार नै गलाया ऐ जे बंद करी दित्ते गेदे जां दुए स्कूलें कन्नै जोड़ी दित्ते गेदे स्कूलें दी गिनतरी कश्मीर दे बारामुला जिले ते जम्मू खित्ते दे जम्मू जिले च सब्बने शा मती ऐ। स्कूल शिक्षा विभाग च शिक्षकें दी असामिएं दे बारे गल्ल करदे होई मंत्री होरें गलाया जे जम्मू डिवीजन च 1 जहार 665 मास्टरे, 2 जहार 218 लैक्चरे, 402 हैडमास्टरे ते 40 प्रिंसिपलें दियां असामियां खाली पेदियां न। इआं गै कश्मीर खित्ते च 1 जहार 671 मास्टरे, 1 जहार 957 लैक्चरे ते 300 हैडमास्टरे दियां असामियां खाली पेदियां न।

<><><><><><>

JKBOSE Inspections

पारदर्शी ते बेहतर एंगे नै मतेयान करोआने गी जकीनी बनाने लेई जम्मू कश्मीर स्कूली शिक्षा बोर्ड दी टीमें आस्सेआ सब्बै 20एँ जिलें च 1कृमतेयान केन्द्र दा चानचक्क दौरा लाया गेआ। इस दरान 95 विद्यार्थीएं गी मतेयानें च नकल करदे होई फगड़ेआ गेआ ते एह्चे मतल्लक लोड़चदी कारवाई कीती गई। बोर्ड नै पारदर्शी, निरपक्ख ते बवस्थित ढंगे नै मतेयान करोआने दी अपनी वचनबद्धता गी पक्का कीता। खित्ते च इसलै 10मीं, 11मीं ते 12मीं जमात दे मतेयान चला करदे न जेह्ड़े इस म्हीने दे खीरै तोड़ी मुक्की जांगन।

<><><><><><>

Enforcement Drive

अतिरिक्त जिला मैजिस्ट्रेट अनसूइया जम्वाल ते जिला मैजिस्ट्रेट सचिन कुमार वैश्य हुंदी निगरानी हेठ कल जम्मू उत्तरी तैहसील च यातायात गी बवस्थित करने सरबन्धी इक सांझी मुहिम चलाई गई। अधिकारिएं तकरीबन 280 गड्डिएं दी जांच कीती, 11 चलान जारी कीते ते 16 गड्डिएं गी यातायात दी नियमें दी पालमा नेई करने करी जब्त कीता। इस पूरे अभियान दरान 1 लक्ख 70 जहार 8 सौ रपे दा जुर्माना हासल कीता गेआ।

<><><><><><>

Reasi-RDD

रियासी दिसां डिप्टी कमीशनर निधि मलिक होरें जिले च ग्रामीण विकास मैहकमे दे कम्में दी प्रगति दा जायजा लैता। इस दरान मुख करी ध्यान एमजी-नरेगा, कैपेक्स बजट, प्रधानमंत्री आवास योजना, ग्रामीण ते होर दुइएँ पैहलकदमिएं पर दित्ता गेआ। डीडीसी होरें प्रोजेक्टें गी तोड़ चाढ़ने लेई उच्चे म्यार दे कम्में उपपर ते पारदर्शिता जकीनी बनाने पर जोर दित्ता। उनें सब्बने

ब्लाक विकास अफसरें गी निर्देश दित्ते जे ओह इसलै जारी विकास कम्में पर नेड़मी तक्क बनाइयै रखन। एहदे अलावा उनें मुत्तलक अधिकारिएं गी प्रधानमंत्री आवास योजना-ग्रामीण दे लाभार्थिएं दा सर्वेक्षण करने लेई बी आखेआ तां जे उंदी वैद्यता दी तस्दीक कीती जाई सकै।

<><><><><><>

Unemployed Youth

सरकारै आखेआ ऐ जे जनवरी 2025 तगर 3 लक्ख 70 ज्हार शा मते बेरोजगार नोजवानें रोजगार पोर्टल पर अपना नां दर्ज करोआया ऐ। आकाशवाणी दे जम्मू संवाददाता नै जानकारी दित्ती ऐ जे इनें पंजीकृत नोजवानें चा 1 लक्ख 13 ज्हार बी.ए ते एम. ए तगर पढ़ाई जारी करी चुके दे ग्रैजुएट ते पोस्ट ग्रैजुएट नोजवान नफ। बीजेपी दे एमएलए शाम लाल शर्मा हुंदे आस्सेआ पुच्छे गेदे जिखित सुआले दा परता दिंदे होई उपमुख्यमंत्रर सुरिन्दर चौधरी जेह्ड़े श्रम ते रोजगार मंत्री बी हैन परता दिंदे होई प्रदेश च सिखलाई याफता ते गैर सिखलाई याफता क्षेत्रें च कम्म रोजगार दे मौके प्रदान करने सरबंधी नीतियां तैआर करने बारे सरकार दियां योजना सांझा कीतियां। मंत्री होरें जानकारी दित्ती जे जनवरी 2025 तगर कुल 3 लक्ख 70 ज्हार 811 बेरोजगार नोजवानें रोजगार पोर्टल अपना दर्ज कीता ऐ। उनें आखेआ जे इक बुनियादी सतह दे सर्वेक्षण मूजब 4 लक्ख 73 ज्हार लोकें जिंदी उमर 18 कोला लेइयै 80 बरें दे बश्कार ऐ कम्म रोजगार करने दी इच्छेआ जाह्र कीती ऐ पर इसलै ओह बेरोजगार न।

<><><><><><>

Udhampur Deworming Day(byte)

टिड्ड दे कीड़े मारने सरबंधी राष्ट्रीय ध्याड़े दे मौके पर कल जिला सेहत सोसायटी उधमपुर आस्सेआ आंगनवाड़ी केन्द्रें ते सरकारी ते प्राइवेट स्कूलें च बक्ख-बक्ख कार्यक्रमें दा आयोजन कीता गेआ ते इस मौके पर टिड्ड दे कीड़े मारने सरबंधी दोआइएं गी तकसीम बी कीता गेआ। उधमपुर दे चीफ मैडिकल अफसर डॉ. अमित मन्हास होरें इस ध्याड़े दे महत्व उप्पर लोह पांदे होई आखेआ जे एहदे कन्नै सेहत बेहतर होंदी ऐ। उनें आखेआ जे शामिल लोकें गी आग्रह कीता जे ओह आम जनता गी इस अणियान बारे जागरूक बनान ते अपने आले दुआले साफ सफाई बनाई रखन तां जे इयै नेही बमारिएं कोला बचेआ जाई सकै। आकाशवाणी समाचार कन्नै गल्ल करदे होई उधमपुर दे चीफ मैडिकल अफसर डॉ. अमित मन्हास होरें आखेआ.....
...बाईट

<><><><><><>

Udhampur-Fin Assistance

उधमपुर दिएं डिप्टी कमीशनर सलोनी राय होरें पंजीकृत मजदूरें देवका च 1 करोड़ 17 लक्ख 1 ज्हार 457 रपे दा माली मदाद जारी कीता ऐ। एह माली मदाद इतारतें ते होर दुए निर्माण कम्में दे मजदूीं दे कल्याण बोर्ड स्कीम तैह्त दित्ती जाग। डिप्टी कमीशनर होरें बड़ी मती गिनतरी च लाभार्थिएं गी सरकार दी कल्याणकारी स्कीमें थमां लाह ठोआने गी जकीनी बनाने लेई गलाया। सरकार दी वचनबद्धता गी इक बारी नरतियै पक्का करदे होई डीसी होरें गलाया जे श्रमकें दी आर्थिक ते समाजिक सुरक्षा सरकार दी प्राथमिकता ऐ।

<><><><><><>

Khelo India Games

बारामुला जिले दे गुलमर्ग च खेड़डी जा'रदी खेलो इंडिया स्यालु गेम्स 2025 दे दुए रोज कल बक्ख-बक्ख प्रतियोगिताएं च खडारिएं बेह्तरनीन प्रदर्शन कीता ऐ। मर्दे दी खड़ी पहाड़ी चढ़ने आली त्रतियोगिता वर्टिकल स्काई मोनटेनरिंग च महाराष्ट्र पूणे

दे सिद्धार्थ गेढकर होरें सुन्ने दा तगमा जित्तेआ जिसलै के इस्सै श्रेणी दी महिला प्रतियोगिता च हिमाचल प्रदेशदी तेनजिन डोलमा होरें सुन्ने दा तगमा अपने नां कीता। नोर्डी स्काई सप्रिंट महिला दी श्रेणी त्रैवे तगमे आईटीबीपी नै जित्ते न, जिसलै के मर्दे दी श्रेणी च फौज दे एथलीटें सब्बै तगमे अपने नां कीते। स्नोबोर्छ जायंट्स स्लेटोम स्पर्धा च जम्मू कश्मीर दे तुबेर अहमद लोन होरें सुन्ने दा तगमा जित्तेआ ऐ। इआं गै अल्पाइन जायंट् स्लेटोम स्पर्धा च महिलाएं दी श्रेणी च हिमाचल प्रदेश दियां आंचल ठाकुर होरें सुन्ने दा तगमा जित्तेआ। जिसलै के इस्सै प्रतियोगिता दी मर्दे दी श्रेणी च फौज दे सुनील कुमार होरें सुन्ने दा तगमा अपने नां कीता।

<><><><><><>

Read:- Abhilasha Sharma & Poonam Dogra

D.E.O. : Mukesh Gupta

Skilled : Rajat

Editor : Kunal Shrivatsa

